

**БНХАУ-ЫН ҮНДЭСНИЙ ХӨГЖИЛ, ШИНЭЧЛЭЛИЙН ХОРООНЫ ҮЙЛ  
АЖИЛЛАГАА, БҮТЭЦ, ЧИГ ҮҮРЭГ**

(Мэдээлэл, лавлагаа)

*Д.Жигваагүнсэл, Ц.Элбэгзаяа*

**АГУУЛГА**

1. Ерөнхий мэдээлэл
2. Үндэсний хөгжил, шинэчлэлийн хорооны дотоод бүтэц, зохион байгуулалт
3. Үндэсний хөгжил, шинэчлэлийн хорооны үйл ажиллагааны үндсэн чиг үүрэг
4. Үйл ажиллагаа, эрх зүйн зохицуулалт
5. Хавсралт

**UIH.MN**  
СҮДАЛГААНЫ САН

## БНХАУ-ЫН ҮНДЭСНИЙ ХӨГЖИЛ, ШИНЭЧЛЭЛИЙН ХОРООНЫ ҮЙЛ АЖИЛЛАГАА, БҮТЭЦ, ЧИГ ҮҮРЭГ

**Ерөнхий мэдээлэл:** БНХАУ-ын Үндэсний хөгжил, шинэчлэлийн хороо <sup>6</sup> нь (National Development and Reform Commission of the People's Republic of China (NDRC), (国家发展和改革委员会)) Төрийн зөвлөлийн бүрэлдэхүүнд багтдаг макро эдийн засгийн удирдлагын газар бөгөөд эдийн засагт захиргааны болон төлөвлөлтийн хяналт тавьдаг байгууллага юм.

Тус хороо нь өмнө нь Улсын төлөвлөлтийн комисс (1952-1998), Улсын хөгжлийн төлөвлөлтийн комисс (1998-2003), Үндэсний бүтээн байгуулалт, шинэчлэлийн хороо (2003-2008), Үндэсний хөгжил, шинэчлэлийн хороо (2008 оноос “Институт байгуулах тухай Төрийн зөвлөлийн мэдэгдэл”<sup>7</sup>-ийн дагуу улсын эдийн засгийн орчин, төлөвлөлтийг сайжруулах, нийгэм, эдийн засгийг тогтвортой хөгжүүлэх чиг үүрэг бүхий төрийн зөвлөлийн бүрэлдэхүүн хэлтэс болсон), Үндэсний хөгжил, шинэчлэлийн комисс (2013-2018) нэртэй байсан.

Хятад улс Төрийн зөвлөлийн институцийн шинэчлэлийг Үндсэн хууль болон Төрийн зөвлөлийн Органик хуульд<sup>8</sup> нийцүүлэн 8 удаа хийсэн бөгөөд энэхүү өөрчлөлтөөр (1982, 1988, 1993, 1998, 2003, 2008, 2013, 2018<sup>9</sup> онд болсон) Үндэсний хөгжил, шинэчлэлийн хорооны нэр болон бүтэц, чиг үүргийг тухай бүр өөрчлөн зохион байгуулсаар иржээ.

Хамгийн сүүлд 2018 оны 3-р сард Бүх Хятадын Ардын төлөөлөгчдийн 13-р Их хурлын анхдугаар хуралдаанаар батлагдсан Төрийн зөвлөлийн институцийн шинэчлэлийн төлөвлөгөөний<sup>10</sup> дагуу Засгийн газрын бүтэц, зохион байгуулалтын өөрчлөлтөөр Үндэсний хөгжил, шинэчлэлийн хорооны бүтэц, чиг үүргийг дахин шинэчлэн баталж, өмнө нь 26 байсан хэлтсийн тоог 24 болгон багасган зарим чиг үүрэг, үйл ажиллагааг бусад газарт шилжүүлсэн байна. Үүнд:

- ✓ Монополийн эсрэг хууль болон үнийн удирдлагыг шинээр байгуулагдсан Зах зээлийг зохицуулах улсын захиргаанд;
- ✓ бүсүүдийг тогтоон байгуулах үүргийг шинээр байгуулагдсан Байгалийн баялгийн яаманд;
- ✓ хөдөө аж ахуйн хөрөнгө оруулалтын төслүүдэд зөвшөөрөл олгох үүргийг Хөдөө аж ахуй ба хөдөө орон нутгийн хэргийн яаманд;
- ✓ Цаг агаарын өөрчлөлт хариуцсан нэгж нь Хүрээлэн буй орчны яаманд;
- ✓ эрүүл мэндийн үйлчилгээний үнэ тогтоох үүрэг шинээр байгуулагдсан Улсын эрүүл мэндийн хороонд;
- ✓ улс үндэстний гол томоохон төслүүдийг хянах үүрэг Улсын аудитын албанд тус тус шилжсэн<sup>11</sup>.

<sup>6</sup> <http://en.ndrc.gov.cn/>

<sup>7</sup> <http://politics.people.com.cn/GB/1026/7163969.html>

<sup>8</sup> Organic Law of the State Council of the People's Republic of China  
[http://www.npc.gov.cn/zgrdw/englishnpc/Law/2007-12/13/content\\_1384048.htm](http://www.npc.gov.cn/zgrdw/englishnpc/Law/2007-12/13/content_1384048.htm)

<sup>9</sup> [http://www.xinhuanet.com/politics/2018lh/2018-03/17/c\\_1122552185.htm](http://www.xinhuanet.com/politics/2018lh/2018-03/17/c_1122552185.htm)


<sup>10</sup> <https://baike.baidu.com/item/国务院机构改革方案>

<sup>11</sup> <https://www.uschina.org/policy/national-development-and-reform-commission>

## **Үндэсний хөгжил, шинэчлэлийн хорооны дотоод бүтэц, зохион байгуулалт<sup>12</sup>**

2018 оны шинэчлэлээр Үндэсний хөгжил, шинэчлэлийн хороо (ҮХШХ) нь үйл ажиллагааны үндсэн чиг үүргийг хэрэгжүүлдэг 24 хэлтэс<sup>13</sup>, шууд харьяаны 5 хороо, товчоо, захиргаа бүхий дараах бүтэцтэй болжээ. Үүнд:

Схем зураг



<sup>12</sup> <http://www.ndrc.gov.cn/zwfwzx/jgsz/>

<sup>13</sup> <http://www.ndrc.gov.cn/zwfwzx/znbm/>

## **Үндэсний хөгжил, шинэчлэлийн хорооны үйл ажиллагааны үндсэн чиг үүрэг<sup>14</sup>**

Тус хороо нь Төрийн зөвлөлийн институцийн шинэчлэлийн төлөвлөгөөний дагуу дараах 15 үндсэн чиг үүргийг хэрэгжүүлдэг байна. Үүнд:

1. Улсын эдийн засаг нийгмийн хөгжлийн стратеги, жилийн төлөвлөгөө, хөгжлийн дунд болон урт хугацааны төлөвлөгөө боловсруулах; эдийн засаг болон нийгмийн хөгжлийг зохицуулах; дотоод гадаадын эдийн засгийн нөхцөл байдлын судалгаа шинжилгээний ажлыг гүйцэтгэх; улсын эдийн засгийн хөгжилтэй холбоотой зорилтууд болон бодлогын, мөн ерөнхий үнийн түвшний зохицуулалт, үндсэн эдийн засгийн бүтцүүдийг оновчтой зохицуулах талаар санал дэвшүүлэх, улмаар олон хувилбарт эдийн засгийн арга хэрэгсэл, бодлогууд хэрэгжүүлэхийг санал зөвлөмж болгох; улсын эдийн засаг, хөгжлийн төлөвлөгөөг Төрийн зөвлөлийн нэрийн өмнөөс Үндэсний ардын хуралд өргөн барих.

2. Макро эдийн засаг, нийгмийн хөгжлийн чиг хандлагыг хянаж, урьдчилсан прогноз, сэрэмжлүүлэг болон мэдээллийн удирдамжаар хангах; макро эдийн засгийн үзүүлэлт, бүрэлдэхүүний тэнцвэр, улсын эдийн засгийн аюулгүй байдал, ба ерөнхий аж үйлдвэрийн аюулгүй байдлын чухал асуудлуудыг судалж макро эдийн засгийн менежментийн талаар бодлого, санал зөвлөмжийг гаргах; эдийн засгийн үйл ажиллагааны гол гол асуудлыг зохицуулах, анхаарал хандуулах, улмаар эдийн засгийн үзүүлэлтийг тохируулах; улсын онц чухал бараа материалын тээвэрлэлтийг зохицуулах зэргийг хариуцах.

3. Төсөв, санхүүгийн нөхцөлийг хураангуйлан шинжилж санхүү, мөнгө болон газрын бодлогыг боловсруулахад оролцох, мөн үнийн бодлогыг боловсруулж хэрэгжүүлэх; төсөв, санхүү болон газрын бодлогуудын хэрэгжилтийн үр дагавруудыг шинжилж, үнийн бодлогуудыг удирдан шалгах; улсын болон бусад тариф, төлбөрөөр зохицуулагддаг чухал эд барааны үнийг тогтоон зохицуулах болон холбогдох хууль, журмын дагуу үнийн зохицуулалтыг зөрчсөн үйл ажиллагааг мөрдөн илрүүлэх; Хятадын гадаад өрийн нийт хэмжээг ажиглаж, хяналт тавих, түүний бүтцийг тогтоох, олон улсын төлбөрийн тэнцэтгэлийг сурталчлан дэмжих.

4. Эдийн засгийн тогтолцооны бүтцийн өөрчлөлтийг удирдан чиглүүлэх, дэмжин сурталчлах ба зохицуулах; гадаад зах зээлтэй холбоотой томоохон асуудлуудыг судлах; эдийн засгийн тогтолцооны бүтцийг өөрчлөх иж бүрэн төлөвлөгөө боловсруулах, эдийн засгийн зорилтот бүтцийн өөрчлөлтийн төлөвлөгөөг зохицуулах, мөн энэхүү төлөвлөгөөг бусад агентлагуудтай хамтран зохицуулах; эдийн засгийн тогтолцооны бүтцийн өөрчлөлтийн туршилтын төслүүдийг удирдан чиглүүлж, шинэчлэх туршилтын бүсүүдэд ажиллах.

5. Томоохон барилгын төслүүд болон үр ашгийн схем бүтцийг төлөвлөх; улсын үл хөдлөх хөрөнгийн хөрөнгө оруулалтын нийт хэмжээ болон бүтэцтэй холбоотой зорилт, бодлого болон арга хэмжээнүүдийг боловсруулах; төв засгийн газрын хөрөнгө оруулалт болон тэнцвэртэй эрэлтийн үүднээс барилгын төслүүдтэй холбоотой зорилтот төлөвлөгөөнүүдийг уялдуулан зохицуулах; эдийн засгийн байгуулалтын төсөв санхүүгийн зардлыг зохицуулах; бүтээн байгуулалтын

<sup>14</sup> <http://www.ndrc.gov.cn/zwfwzx/jj/>

барилгын төслүүд, гадаадын санхүүжилттэй чухал төслүүд, гадаад нөөцийг хөгжүүлэх чухал хөрөнгө оруулалтын төслүүд, Төрийн зөвлөлийн зөвшөөрлөөр их хэмжээний хөрөнгө оруулалт зэрэгт зөвшөөрөл олгох, удирдах, хяналт тавих; барилгын төслүүд дэх гадаад зээлийн хэрэглээг удирдан чиглүүлэх; хувийн хөрөнгө оруулалтыг удирдан чиглүүлэх.

6.Стратегийн эдийн засгийн бүтцийн өөрчлөлтийг хөхиүлэн дэмжих; аж үйлдвэрийн цогц бодлого боловсруулах ажлыг зохион байгуулах, анхдагч, хоёрдогч болон гуравдагч үеийн аж үйлдвэрүүдийн хөгжлийн гарцыг тодорхойлж, зохицуулахын зэрэгцээ аж үйлдвэрийн хөгжлийг холбогдох төлөвлөгөө, улсын эдийн засаг болон нийгмийн хөгжлийн гол гол бодлого төлөвлөгөөнүүдтэй уялдуулан, тэнцвэржүүлэх; хөдөө аж ахуй, хөдөөгийн эдийн засаг, нийгмийн хөгжлийн гол томоохон асуудлуудыг зохицуулах; үйлчилгээний аж үйлдвэрийн хөгжлийн стратеги, хөгжлийн бодлогуудыг бусад яамдтай хамтран боловсруулах; орчин үеийн тээвэр зуучлалын стратеги, төлөвлөгөөнүүдийг боловсруулах; хэрэглээний өөрчлөлтийн чиг хандлагыг нарийвчлан судалж, хэрэглээг дэмжих бодлогын цогц арга хэмжээг боловсруулах.

7.Бүс нутгийн хөгжлийн төлөвлөгөөг нэгтгэн зохион байгуулах, эдгээр төлөвлөгөөг хэрэгжүүлэх ажлыг зохицуулах, мониторинг болон үнэлгээг хийх; бүс нутгийн эдийн засгийн зохицуулалттай хөгжил, баруун бүс нутгийн хөгжил, зүүн умард бүс нутаг ба бусад аж үйлдвэрийн хуучин баазуудын сэргээн ашиглалт ба Хятадын төв бүс нутгийн дэвшил зэргийг сурталчлан дэмжих стратеги, төлөвлөгөө болон бодлогуудыг боловсруулах; хотжуулах шинэ стратеги ба бодлогуудыг судлан санал болгох; бүс нутгийн эдийн засгийн хамтын ажиллагааг удирдан чиглүүлж, зохицуулах.

8.Үйлдвэрлэлийн цогц бодлогыг боловсруулах, зохион байгуулах; хөдөө аж ахуйн бараа бүтээгдэхүүн, аж үйлдвэрийн бүтээгдэхүүн ба түүхий эдийн импорт, экспортын ерөнхий хэмжээний төлөвлөгөөг боловсруулж, улмаар эдгээр төлөвлөгөөний хэрэгжилтийг удирдан чиглүүлэх; үр буудай, хөвөн, элсэн чихэр гэх зэргийн улсын нөөцийн бараа бүтээгдэхүүнийг бусад яамдын хамтаар удирдан зохион байгуулах.

9.Нийгмийн хөгжлийн бодлогуудыг улсын эдийн засгийн хөгжлийн бодлогуудтай уялдуулан зохицуулах; нийгмийн хөгжлийн стратеги, ерөнхий төлөвлөгөө, жилийн төлөвлөгөө зэргийг боловсруулах ажлыг зохион байгуулах; хөгжлийн бодлогуудыг хүн ам, гэр бүл төлөвлөлт, шинжлэх ухаан технологи, боловсрол, соёл, эрүүл мэнд ба иргэний захиргаа зэрэгтэй уялдуулан боловсруулахад оролцож, нийгэм журмыг байгуулах ажлыг сурталчлан дэмжих; улам бүр өсөн нэмэгдэж буй ажил эрхлэлт, орлогын хуваарилалтыг зохицуулах ба нийгмийн аюулгүй байдал болон эдийн засгийн хөгжлийн уялдааг сайжруулах талаар судалж, санал болон бодлого боловсруулан дэвшүүлэх; нийгмийн үйл ажиллагааны хөгжил, шинэчлэл дэх томоохон асуудлуудын шийдвэрлэлт болон бодлогуудыг уялдуулан зохицуулах.

10.Тогтвортой хөгжлийн стратегийг дэмжин сурталчлах; эрчим хүчийг хэмнэж цацрагийг бууруулах ажлыг зохицуулах; эдийн засгийн дахин боловсруулалт, улсын эрчим хүч болон нөөц баялгийн хадгалалт, ашиглалтыг боловсруулах болон хэрэгжүүлэх ажлыг зохион байгуулах; экологийг сайжруулах болон байгаль орчноо

хамгаалах төлөвлөгөө боловсруулахад оролцох; эко барилга, эрчим хүч ба баялгийн хадгалалт, ашиглалт зэрэгтэй холбоотой асуудлуудыг шийдвэрлэх ажлыг зохицуулах; хүрээлэн буй байгаль орчинд ээлтэй аж үйлдвэр ба цэвэр бүтээгдэхүүнийг дэмжихэд чиглэсэн холбогдох ажлуудыг зохицуулах.

11.Инновацид суурилсан хөгжлийн стратеги хэрэгжүүлэхийг дэмжих үүднээс холбогдох хэлтэстэй хамтран инноваци, бизнес эрхлэлтийг дэмжих төлөвлөгөө, бодлогыг боловсруулж, эдийн засгийн хөгжилд ахиц гаргах бодлогыг санал болгох; Үндэсний шинжлэх ухаан, технологийн томоохон дэд бүтцийг төлөвлөх, байршуулах чиглэлээр холбогдох газруудтай хамтран ажиллах; Өндөр технологийн үйлдвэрүүд болон шинэ аж үйлдвэрийг хөгжүүлэх бодлогын хэрэгжилтийг зохион байгуулах, сурталчлах, аж үйлдвэрийг шинэчлэх, томоохон техник хэрэгслийг сурталчлах, ашиглах зэрэг асуудлыг шийдвэрлэх.

12.Улсын эдийн засаг, нийгмийн хөгжил, эдийн засгийн тогтолцооны бүтцийн өөрчлөлт ба түүнийг гадаад орчинтой холбох тухайд холбогдох хууль, журмуудын төслийг боловсруулах, төлөвлөгөөг боловсруулах; төндөр шалгаруулалтыг хууль, журмын дагуу удирдан зохицуулах.

13.Улсын эдийн засгийн дайчилгааны төлөвлөгөөг боловсруулах, зохион байгуулах; улсын эдийн засгийн дайчилгааг улсын эдийн засаг ба батлан хамгаалах салбартай харьцуулан судлах, улсын эдийн засгийн дайчилгаатай холбоотой чухал асуудлуудыг зохицуулах, тэрчлэн хэрэгжилтийг зохион байгуулах.

14.Улсын батлан хамгаалах дайчилгааны комисс, Төрийн зөвлөлийн баруун бүс нутгийн хөгжлийн тэргүүлэх бүлгийн алба, Төрийн зөвлөлийн Зүүн умард Хятадыг нөхөн сэргээх тэргүүлэх бүлгийн алба болон бусад хуучин аж үйлдвэрийн баазууд, эрчим хүчний хадгалалт ба цацрагийг бууруулах Үндэсний тэргүүлэх бүлгийн алба, Улсын үр буудай, материал хангамжийн ерөнхий газар болон Үндэсний эрчим хүчний захиргаа зэргийн үйл ажиллагааг удирдлагаар хангах, зохицуулах;

15.Төрийн зөвлөлөөс даалгасан бусад үүргийг биелүүлэх зэрэг болно.

Дээрх үйл ажиллагааны чиг үүргийг хэлтэс тус бүр холбогдох чиглэлийн дагуу (Хавсралт <sup>15</sup>) хариуцан хэрэгжүүлдэг. Зөвлөлийн дарга бүх хорооны үйл ажиллагааг удирдан чиглүүлдэг бол хэлтсийн дарга нар хариуцсан хэлтсийн үйл ажиллагааг удирдан явуулж, үр дүнг Зөвлөлийн даргад тайлагнадаг байна.

### **Хорооны үйл ажиллагаа, эрх зүйн зохицуулалт**

Төрийн зөвлөлийн шинэчлэлийн төлөвлөгөөгөөр хорооны чиг үүрэг болон ерөнхий бүтцийг баталсан бол Төрийн зөвлөлийн Органик хуулиар яам комиссыг байгуулах, татан буулгах, тэдгээрийн удирдлагыг томилж, чөлөөлөх, үйл ажиллагааны хүрээ зэргийг тогтоосон байна. Тухайлбал,

Төрийн зөвлөлийн Органик хуулийн 2-р зүйлд зааснаар Төрийн зөвлөл нь Ерөнхий сайд, Ерөнхий сайдын орлогч, яамдын асуудал эрхэлсэн сайд, **комиссын асуудал эрхэлсэн сайд**, Ерөнхий аудитор, Ерөнхий нарийн бичгийн даргаас бүрдэнэ.

<sup>15</sup> [https://www.uschina.org/sites/default/files/2018.12.28\\_ndrc.pdf](https://www.uschina.org/sites/default/files/2018.12.28_ndrc.pdf)



Мөн 5-р зүйлд **Ерөнхий сайд** Төрийн зөвлөлийн гаргасан шийдвэр, тушаал, захиргааны журам, Төрийн зөвлөлийн Үндэсний Ардын Их Хурал эсвэл түүний Байнгын хороонд ирүүлсэн саналд, **боловсон хүчний томилгоо, чөлөөлөлтөд** гарын үсэг зурна.

8-р зүйлд Төрийн зөвлөлийн **яам, комисс байгуулах, тэдгээрийн удирдлагыг томилох, татан буулгах, нэгтгэхийг Ерөнхий сайд санал болгож, БХАТИХ, Их хурал хуралдаагүй тохиолдолд түүний байнгын хороо шийдвэрлэнэ.**

9-р зүйлд Яам болгон сайд, хоёроос дөрвөн дэд сайдтай байна. **Комисс бүр сайд, хоёроос дөрвөн дэд сайд, комиссын таван гишүүнээс** бүрддэг.

**Яам, комиссын ажил хариуцсан сайд нь яам, комиссын ажлын ерөнхий хариуцлагыг хүлээнэ. Яам, комиссыг хариуцсан сайд нар өөрсдийн харьяа хэлтсийнхээ ажлыг удирдан чиглүүлнэ; сайд нарын хурал, комиссын ерөнхий ба гүйцэтгэх хуралдааныг хуралдуулж, даргалах; заавар, тайланг Төрийн зөвлөлд хүргүүлэх чухал хүсэлтүүдэд гарын үсэг зурах; харьяа хэлтсүүдэд тушаал, заавар өгөх; дэд сайдууд сайд нарын ажилд туслах** зэрэг болно.

10-р зүйлд Яам, хороо нь ажилдаа баримтлах зарчим, бодлого, төлөвлөгөө, захиргааны чухал арга хэмжээний талаар зааварчилгаа гаргахаас гадна Төрийн зөвлөлд тайлан гаргаж өгөх бөгөөд Төрийн зөвлөл тус асуудлаар шийдвэр гаргана. Эрх бүхий яам, комисс нь бүрэн эрхийнхээ хүрээнд хууль тогтоомж, Төрийн зөвлөлийн шийдвэрийн дагуу тушаал, заавар, дүрмийг гаргаж болно гэж тус тус хуульчилжээ.

Дээрх хуульд зааснаар Комиссын даргыг БНХАУ-ын Ерөнхий сайд нэр дэвшүүлж, Ардын Төлөөлөгчдийн Их Хурлаар батлан томилдог. Мөн хуульд Комиссын удирдлагын бүрэлдэхүүнийг тодорхой заасан байх ба комисс бүр сайд, 2-4 дэд сайд, комиссын 5 гишүүнээс бүрдэнэ хэмээн хуульчилжээ.

Мөн 2018 оны Төрийн зөвлөлийн институцийн шинэчлэлийн төлөвлөгөөний дагуу Үндсэн хууль болон Төрийн зөвлөлийн Органик хуульд нийцүүлэн шинэчлэн боловсруулсан Төрийн зөвлөлийн ажлын дүрэм<sup>16</sup> (Гуо Фа [2018])-д зааснаар Яам, **хороо**, Ардын банк, Үндэсний аудитын газрын сайд, захирал, Ерөнхийлөгч, ерөнхий аудиторуд нь хэлтсийн ажлыг удирдан явуулах, үүрэг хариуцлагыг хэрэгжүүлнэ. Мөн бүх яам, **хороо**, Ардын банк, Үндэсний аудитын газар нь хууль тогтоомж, захиргааны журам, Төрийн зөвлөлийн шийдвэр, тушаалын дагуу чиг үүрэг боловсруулж, бүрэн эрхийнхээ хүрээнд тушаал гаргах эрхтэй гэж заажээ.

Төрийн зөвлөлийн Захиргааны байгууллага байгуулах тухай<sup>17</sup> 227-р тушаалын 21-т зааснаар Төрийн зөвлөлийн удирдах албан тушаалтнуудыг Төрийн зөвлөлийн Органик хуулийн дагуу харин Төрийн зөвлөлийн харьяа байгууллагуудын удирдах албан тушаалтнуудыг Төрийн зөвлөлийн Органик хуулийн зарим заалтад үндэслэн холбогдох дүрэм журмын дагуу тогтооно гэж тус тус зохицуулжээ.

<sup>16</sup> [https://zh.wikisource.org/wiki/国务院工作规则\\_\(2018年\)](https://zh.wikisource.org/wiki/国务院工作规则_(2018年))

<sup>17</sup> <https://baike.baidu.com/item/%E4%B8%AD%E5%8D%8E%E4%BA%BA%E6%B0%91%E5%85%B1%E5%92%8C%E5%9B%BD%E5%9B%BD%E5%8A%A1%E9%99%A2%E4%BB%A4%E5%BC%88%E7%AC%AC227%E5%8F%B7%E5%BC%89/23190041>

## АШИГЛАСАН МАТЕРИАЛ

- <https://baike.baidu.com/reference/3216360/3e33xUpd2p7sJRJ2nmgc1lw-CRH159Bxvf7qWsdCoZlg1PBC-sLAETW96WV3WqiMv9xfUy3FApVKjq3Kfilf4jDeczCqkAwbk2v2Xt3FltovaAZ5B0VuYborZpDAf5>
- <http://www.ndrc.gov.cn/zwfwzx/jgsz/>
- [https://zh.wikisource.org/wiki/国务院工作规则\\_\(2018年\)](https://zh.wikisource.org/wiki/国务院工作规则_(2018年))
- [https://www.uschina.org/sites/default/files/2018.12.28\\_ndrc.pdf](https://www.uschina.org/sites/default/files/2018.12.28_ndrc.pdf)
- <http://en.ndrc.gov.cn/>
- <http://www.ndrc.gov.cn/zwfwzx/znbm/>
- <http://www.ndrc.gov.cn/zwfwzx/jj/>
- <http://politics.people.com.cn/GB/1026/7163969.html>
- Organic Law of the State Council of the People's Republic of China  
[http://www.npc.gov.cn/zgrdw/englishnpc/Law/2007-12/13/content\\_1384048.htm](http://www.npc.gov.cn/zgrdw/englishnpc/Law/2007-12/13/content_1384048.htm)
- [http://www.xinhuanet.com/politics/2018lh/2018-03/17/c\\_1122552185.htm](http://www.xinhuanet.com/politics/2018lh/2018-03/17/c_1122552185.htm)
- <https://baike.baidu.com/item/国务院机构改革方案>
- <https://www.uschina.org/policy/national-development-and-reform-commission>
- <https://baike.baidu.com/item/%E4%B8%AD%E5%8D%8E%E4%BA%BA%E6%B0%91%E5%85%B1%E5%92%8C%E5%9B%BD%E5%9B%BD%E5%8A%A1%E9%99%A2%E4%BB%A4%EF%BC%88%E7%AC%AC227%E5%8F%B7%EF%BC%89/23190041>

UIH.MN  
СҮДАЛГААНЫ САН